

INUIT ATAQATIGIIT

Inatsisartuni



UPA 2017/161
Nuuk, 08.05.2017
Kelly Berthelsen

Inissianik attartortitsinermit isertitanik, maanna konto pingaarnermi 72.10.16 Inissiat attartortittakkat ingerlanneqarnerat iluanaarutisiatut immikkoortinneqartunit isertitat ukiuni tallimani annikilliarortillugit isumalluutaajunnaarnissaat pillugu Naalakkersuisut peqquneqarnissaannik Inatsisartuni aalajangiiffigisassatut siunnersuut.

(Inatsisartunut ilaasorta q Bendt B. Kristiansen, Inuit Ataqatigiit)

Bendt B. Kristiansenip inissianut akiliutinit namminersorlutik oqartussat iluarisaminnik atugasaminnik iluanaaruteqartarnerata unitsinneqarnissaannik siunnersuutaa Inuit Ataqatigiinniit imaattumik oqaaseqarfigissavarput.

Namminerisamik ineqarneq inuussutissaqassutsip saniatigut inuit atukkatsinni pingaarnarpaartaat ilagaat. Nunatsinni issittaqisumi inissaqarnissaq pisariaqarluinnaqqissaarpoq, nammineri-samillu ineqanngikkaani inuit allat naakkinninnerinnaannik isumalluuteqarnissaq inummut tannikkut peqqinnangilluinnarpoq. Tassa ineqarneq inuttut pisariaqakkat pinngitsoorneqarsinnaangilluinnartut ilagaat.

Ineqarnerlu qanoq aqqissuutissavarput? Akissalinnut tamanna ajornanngitsunnguuvooq, namminerisamik piginneqatigiilluniluunniit illutaartoqarsinnaavoq. Pisinnaasut piumasullu pitsaasunik periarfsisaqartitaassaptu.

Kisiannili sulinermik inuussutissarsiutillit nalinginnaasumik akissarsiallit sanaartorneq taama akisutigitillugu imaaliinarlutik akissaqalersinnaangillat.

Taamaammat illoqarnikkut inuiaqatigiit nammaqatigiittariaqarput, inuiaqatigiit akileraarutit atorlugit ataatsimoorussisariaqarput.

Ataatsimoorussineq ima Inuit Ataqatigiinniit paaserusupparput: inuit nammaqatigiillutik piffissaq taanna illut pisariaqartinneqartut sanassavaat akilissallugillu. Imaassanngilaq pisariaqartinneqartut taakku piffissap ingerlanerani inunnut nammagaqareeqisunut akilertinniarneqarusaassasut, taamaassimappammi nammaqatigiinnermik oqarnerigaluaq ilumoornaviannngilaq.

Nammaqatigiinneq taama paasillugu siunnersuuteqartoq matumuuna Inuit Ataqatigiinniit tapserparput siunnersuutillu ataatsimiititaliamit attuumassuteqartumit suliarilluarneqarnissaa kaammattuutigiinnarumavarput.

Kelly Berthelsen, Inuit Ataqatigiit